

■ FORUM

Per il talian en scolas dal «Kulturkanton»

La regenza da l'Argovia ha gist publictà sias propostas da spargn per il preventiv 2014. Sco adina en tals cas stuessan era las scolas putrar ina part da las unfrendas finanzialas. Ins em-

blida memia savens che la Svizra na posseda ni ieli, ni metals rars, e che sia ritgezza principala provegn da la buna furmazion che sias scolas pon dar a la giuventetgna. Relevanta en lez regard, en noss temp da globalisaziun, è l'instrucziun da linguas, cunzunt da linguatgs naziunals, ma er da las principalas linguas da l'immigraziun. Il talian dovr'ins en la Bassa en contact cun lavurers esters e lur famiglias, ma era cun burgaisas e burgais svizzers che vivan a nord dal Bernina e dal Gottard. L'Argovia, quart chantun svizzer areguard la populaziun (618 147 olmas), è situà amez la principala regiun economica dal pajais, cun impurtantas instituziuns da perscrutaziun. Dalonder il «Schrecken und Bedauern» da responsabels chantunals da l'educaziun en in tal chantun, cun leger ch'ins veglia porscher instrucziun da talian, sco rom facultativ da la scola districtuala, mo pli en il davos onn. Perquai hani tramess ina petiziun a la regenza per la supplitgar da mantegnair l'offerta da fin ussa. La scola districtuala da l'Argovia, numnada era progimnasi, è quella cun il nivel il pli aut; ella dura quatter onns, da la 6avla

a la 9avla, e correspunda pia, d'advent da la 7avla, a nossa scola secundara ed als emprims trais onns da noss gimnasi. Ils auturs da la petiziun han motivà lur postulat cun ils sis arguments suandants :

Sis buns motifs

«1. Il dumber d'uras emnilas da talian dadas fin ussa, trais durant duos onns, correspunda a las pretendiuns d'instrucziun moderna da lingua estra. Ina reducziun muntass ch'ins avriss las portas a la superfizialitad.

2. En il chantun Tessin ed en il Grischun italofon emprenda la giuventetgna tudestg sco rom obligatoric. Ils programs da barat linguistic, promovids cun success da l'Argovia e dal Tessin, èn pussaivels ed efficacis mo sin la basa d'ina buna savida linguistica.

3. Il talian sco rom facultativ tschernan quellas scolaras e quels scolars che vulan prestar dapli ch'il minimum. El fa pia part da la promoziun da talents. Nus lain stimular lezza tenuta cun ina buna offerta linguistica.

4. Il talian è in linguatg naziunal svizzer. L'artitgel da linguas da la constituiun federala (art. 70.2 e 70.3) prescriba da promover l'encletg tranter las cuminanze linguisticas. L'Argovia [sco 'Kulturkanton'] è qua exemplarica.

5. Bliers umans che n'èn betg italofons discurren tuttina talian en il mintgadi. En secturs sco la sa-

nadad, l'industria e la construcziun, serve il talian da 'lingua franca'; senza il talian na pudess ins betg communitgar tar lezzas activitads. Per bliers avdants da l'Argovia è'l perfin la lingua famigliara.

6. Dus onns da talian en la scola districtuala dattan in bun fundament per sa perfecziunar en il gimnasi e per duvrar la lingua en ils manaschis d'emprendissadi. Nus stua in promover l'interess e l'encletg da la giuventetgna per tschellas regiuns linguisticas da la Svizra.»

Tgi ha sutscrit?

La petiziun han sutscrit tschintg represchentants da la magistraglia da talian: Maria Ferreri, Annamaria Huonder (Wohlen: annamaria_huonder@hotmail.com), Marilena Iacopetta, Hans-Paul Müller (Aarau: hanspaul.mueller@bluewin.ch) ed Irene Spadea. Plinavant han firmà Luca Bernasconi, schef da l'immunologia a l'Ospital chantunal d'Aarau, Anna Felder, scriptura da derivanza tessinaisa, autura da «Dove piove e non piove», Donato Sperduto, parsura da l'Uniun svizra da la magistraglia da talian, ed autras persunalitads dal chantun. Ins po sutscriver enfin ils 31 da schaner 2014, era sch'ins na viva betg en Argovia e na posseda betg il passaport svizzer. *Guiu Sobiela, Ardez*